

27. febrúar 1990

17

Nr. 13

## AUGLÝSING

**um að forseti Íslands sé kominn heim og tekinn við stjórnarstörfum.**

Forseti Íslands, Vigdís Finnbogadóttir, er komin úr för sinni til útlanda og hefur á ný tekið við stjórnarstörfum.

*Forsætisráðuneytið, 27. febrúar 1990.*

**Steingrímur Hermannsson.**

*Guðmundur Benediktsson.*

1. mars 1990

Nr. 14

## AUGLÝSING

**um staðfesting forseta Íslands á breytingu á reglugerð nr. 78/1979,  
fyrir Háskóla Íslands, með áorðnum breytingum.**

Forseti Íslands féllst hinn 1. mars 1990 á tillögu menntamálaráðherra um að staðfesta eftirfarandi breyting á reglugerð nr. 78/1979, fyrir Háskóla Íslands, með áorðnum breytingum:

1. gr.

57. grein orðist svo:

Sá, er æskir doktorsnafnbótar, skal að jafnaði hafa lokið kandídatsprófi eða embættisprófi. Háskóladeild er heimilt að skipuleggja doktorsnám í einstökum kennslugreinum samkvæmt nánari ákvæðum í reglugerð þessari um nám í viðkomandi deild. Doktorsnámi lýkur með doktorsprófi.

2. gr.

58. gr. orðist svo:

Doktorspróf er fólgið í samningu ritgerðar eða ritgerða, munnlegri vörn, og enn fremur geta einstakar deildir með samþykki háskólaráðs skilið til, að doktorsefni flytji fyrirlestur um fræðileg efni, einn eða fleiri. Til doktorsritgerðar eru gerðar kröfur um vísindaleg vinnubrögð og frumlegt framlag doktorsefnisins til viðkomandi vísindagreinar. Ritgerðin skal dæmd og varin samkvæmt reglum háskólans um doktorsritgerðir og doktorsvörn.

Umsókn um að þreyta doktorspróf skal stíluð til viðkomandi deildar.

Nú leggur sá, er æskir að taka doktorspróf, fram fleiri ritgerðir en eina, og verða ritgerðir þá að varða sama megin rannsóknarsvið og mynda nokkra heild. Þegar svo stendur á, skal semja sérstaka yfirlitsritgerð, þar sem dregið er saman efni hinna einstöku ritgerða og settar fram heildarályktanir.

A 2

Ritgerð má vera á erlendu máli, en áskilja má, að hún geymi rækilegan útdrátt á íslensku. Háskóladeild getur veitt manni leyfi til að tala erlent mál við doktorspróf.

Þeir stúdentar sem uppfylla kröfur viðkomandi deildar um aðfararnám geta sótt um aðgang að doktorsnámi. Deild er heimilt að skipuleggja hæfnispróf fyrir umsækjendur.

### 3. gr.

96. grein (áður 97. gr.) orðist svo:

Kennslugreinar eru þessar:

- a) Til B.A. prófs: Almenn bókmenntafræði, almenn málvísindi, danska, enska, finnska, franska, gríska, heimspeki, íslenska, latína, norska, rússneska, sagnfræði, spænska, sænska og þýska. Auk þess er heimilt að taka upp kennslu í aukagreinum eftir nánari ákvörðun deildar.
- b) Til M.Paed. prófs: Íslenska.
- c) Til M.A. prófs: Danska, enska, íslenskar bókmenntir, íslensk málfræði, íslensk fræði og sagnfræði.
- d) Til doktorsprófs: Íslenskar bókmenntir, íslensk málfræði og sagnfræði.
- e) Til B.Ph.Isl. prófs: Íslenska fyrir erlenda stúdenta.

Deildin tekur nánari ákvarðanir um skiptingu kennslugreina í námskeið og um vægi þeirra í námseiningum, í hvaða röð námskeið skulu tekin og hver þeirra séu skyldunámskeið. Þó skulu almenn málvísindi og bókmenntafræði ætíð vera skylduþættir í tungumálum.

Ef sérstakir erfiðleikar eru á kennslu í einhverri kennslugrein, getur deildin ákveðið að hún skuli ekki kennd. Stúdentar, sem lokið hafa einu námskeiði í kennslugrein, eiga rétt á að ljúka 30 e í greininni.

Við gerð kennsluskrár skal við það miðað að stúdent þurfi ekki að sækja fleiri/en 12 kennlustundir á viku þegar frá eru taldir æfingátímar, sem krefjast ekki undirbúnings.

### 4. gr.

97. gr. (áður 98. gr.) orðist svo:

Kennslu til B.A. prófs skal haga þannig, að stúdent sé unnt að ljúka námi á þremur árum og kennslu til M.Paed. prófs og M.A. prófs þannig að stúdent geti lokið námi á tveimur árum að loknu B.A. prófi. Kennslu til prófs í íslensku fyrir erlenda stúdenta skal haga þannig að ljúka megi námi á þremur árum.

Námsmat felst í skriflegum og/eða munnlegum prófum, æfingavinnu, verkefnum eða ritgerðum. Tilhögun námsmats fer eftir samkomulagi kennara og nemenda og skal það liggja fyrir, áður en mánuður er liðinn af kennslu. Náist ekki samkomulag skal málinu vísað til námsnefndar og þaðan til deildarráðs ef þörf krefur.

### 5. gr.

98. gr. (áður 99. gr.) orðist svo:

Nám skal vegið í einingum (e) og skal ársnám talið 30 e. Námskeið skulu að jafnaði vera 5 e eða margfeldi af 5 e. Þó má deildarráð veita undanþágu frá þessu.

### I. B.A. próf.

Til B.A. prófs er krafist minnst 90 e að viðbættum heimspekilegum forspjallsvísindum (3 e). Stúdent velur sér aðalgrein úr kennslugreinum þeim, sem upp eru taldar í 96. gr., 1. mgr., a-lið, og tekur í henni minnst 60 e. Einnig skal stúdent velja aukagrein úr sömu greinum og ljúka í henni 30 e. Heimspekideild getur þó heimilað 30 e viðbótarnám í aðalgrein er komi í stað aukagreinar. Stúdent er heimilt með samþykki heimspekideildar að sækja aukagrein til

annarra deilda. Ákveða má, að hluti aðalgreinar eða aukagreinar sé valfrjáls námskeið. Heimilt er stúdent í samráði við greinarkennara að sækja námskeið til annarra deilda. Minnst 5 e skulu felast í samningu lokaritgerðar, en deildin má þó veita undanþágu frá þeirri reglu.

## II. M.Paed. próf.

Að loknu B.A. prófi við heimspekideild Háskóla Íslands eða jafngildu prófi við annan háskóla, sem deildin viðurkennir, er stúdent heimilt að hefja nám til M.Paed. prófs í þeirri grein sem var aðalgrein hans til B.A. prófs.

Til M.Paed. prófs er krafist minnst 60 e og skulu þar af minnst 30 e vera úr þeim námskeiðum aðalgreinar sem sérstaklega eru ætluð verðandi kennurum eða þykja henta vel sem undirbúningur undir kennslu í framhaldsskóla. Þá skulu minnst 30 e vera úr námskeiðum í uppeldis- og kennslufræðum, eða öðrum námskeiðum sem félagsvísindadeild viðurkennir sem nám til kennsluréttinda.

## III. M.A. próf.

Að loknu B.A. prófi má stúdent hefja nám til M.A. prófs í þeirri grein sem var aðalgrein hans til B.A. prófsins.

Aðgang að M.A. námi í íslenskum bókmenntum eiga þeir, sem lokið hafa B.A. prófi í íslensku sem aðalgrein eða í almennri bókmenntafræði sem aðalgrein og íslensku sem aukagrein. Aðgang að M.A. námi í íslenskri málfræði veitir B.A. próf í íslensku sem aðalgrein eða í almennum málvísindum sem aðalgrein og íslensku sem aukagrein. Aðgang að M.A. námi í íslenskum fræðum eiga þeir sem lokið hafa B.A. prófi í íslensku sem aðalgrein.

Uppfylli stúdent ekki ofangreind skilyrði skal honum þó heimilt að hefja nám til M.A. prófs við deildina, hafi hann áður lokið hliðstæðu háskólaprófi og uppfyllt sérstakar viðbótarkröfur sem heimspekideild setur. Deildin getur heimilað stúdent að stunda einstök námskeið er teljast til M.A.-náms á því misseri sem hann lýkur B.A.-námi.

Til M.A. prófs er krafist minnst 60 e og skulu þar af minnst 30 e vera úr námskeiðum aðalgreinar, en heimilt er að velja námskeið allt að 15 e úr öðrum skyldum greinum í samráði við kennara aðalgreinar. Ritgerð skal vega minnst 15 e en mest 20 e, og skal umfang hennar ákveðið áður en vinna við hana hefst. Ritgerðarefni velur stúdent einnig í samráði við kennara aðalgreinar. Nánari leiðbeiningar um vægi ritgerða og einstakra námskeiða skal setja í námsskipunarreglum sem heimspekideild samþykkir fyrir hverja námsgrein og námsbraut.

## IV. Doktorspróf.

Stúdent sem hefur lokið M.A. prófi frá heimspekideild Háskóla Íslands með fyrstu einkunn getur sótt um aðgang að doktorsnámi. Stúdentar í doktorsnámi skulu velja sér leiðbeinanda á sérsviði sínu og sækja sérhæfð námskeið samkvæmt nánari námsskipunarreglum sem heimspekideild setur fyrir hverja grein. Enn fremur skal hann stunda a.m.k. eins árs fullt nám í aðalgrein sinni eða stuðningsgreinum hennar við erlendan háskóla, sem deildin viðurkennir. Námsáætlun skal samin í samráði við leiðbeinanda og staðfest af deildinni. Námsárangur skal staðfestur með mati sem deildin viðurkennir, og með árangri sem hún metur fullnægjandi.

Stúdent sem hefur lokið M.A. eða öðru samsvarandi prófi frá annarri deild Háskóla Íslands eða öðrum háskóla, sem deildin viðurkennir, með jafngildi fyrstu einkunnar, getur sótt um aðgang að doktorsnámi við heimspekideild. Skal honum skylt að gangast undir hæfnispróf. Þá skal menntun hans metin með tilliti til aðalgreinar við doktorsnám og honum gerðar frekari námskröfur en þeim stúdentum sem lokið hafa M.A. prófi frá deildinni.

Stúdent í doktorsnámi velur sér rannsóknarverkefni í samráði við leiðbeinanda sinn og gerir áætlun um hvernig að verkinu skuli staðið. Áætlunin skal lögð fyrir deildina til sam-

þykktar. Staðfesti deildin áætlunina hefst rannsóknarvinna undir leiðsögn leiðbeinanda. Doktorsefnið lýkur rannsóknum sínum með því að semja eina heildstæða doktorsritgerð undir leiðsögn leiðbeinanda. Leiðbeinanda er ekki heimilt að sitja í dómnefnd um ritgerðina. Ritgerðin skal dæmd og varin samkvæmt reglum háskólans um doktorsritgerðir og doktorsvarnir.

V. B.Ph.Isl. próf.

Til prófs í íslensku fyrir erlenda stúdentar er krafist minnst 90 eininga og skulu 5 e þar af vera ritgerð.

Erlendir stúdentar, sem þegar hafa nokkra þekkingu á íslensku, geta uppfyllt námskröfur fyrsta árs með því að standast sérstakt stöðupróf sem haldið er við upphaf haust- misseris ár hvert.

Auk kennslu til þeirra prófa sem nú hafa verið talin er heimspekideild heimilt að skipuleggja ýmsar námsleiðir að loknu B.A. prófi innan deildarinnar eða í samvinnu við aðrar deildir.

6. gr.

Við síðustu málsgrein 110. gr. bætist nú setning svohljóðandi:  
Einnig er heimilt að gera kröfur um námsárangur milli námsára.

7. gr.

Reglugerð þessi er sett samkvæmt heimild í 40. gr. laga nr. 77/1979, um Háskóla Íslands, og öðlast þegar gildi.

*Menntamálaráðuneytið, 1. mars 1990.*

**Svavar Gestsson.**

*Árni Gunnarsson.*

## L Ö G

### vegna aðildar Íslands að Evrópusamningi um varnir gegn pyndingum og ómannlegri eða vanvirðandi meðferð eða refsingu.

FORSETI ÍSLANDS

*gjörir kunnugt:* Alþingi hefur fallist á lög þessi og ég staðfest þau með samþykki mínu:

1. gr.

Með lögum þessum eru sett fyrirmæli vegna aðildar Íslands að Evrópusamningi um varnir gegn pyndingum og ómannlegri eða vanvirðandi meðferð eða refsingu frá 26. nóvember 1987.

2. gr.

Nefnd, sem stofnsett er samkvæmt samningnum til að rannsaka meðferð frelsissviptra manna, hefur rétt til að heimsækja hvern þann stað hér á landi þar sem frelsissviptur maður er vistaður samkvæmt ákvörðun yfirvalda ef:

1. Tilgangur heimsóknar er að rannsaka hvernig meðferð maðurinn sætir, og
2. nefndin hefur tilkynnt þá fyrirætlun sína að heimsækja staði hér á landi.